



Sesida dals

16 d'october 2023

Communitgà ils

18 d'october 2023

Protocol nr.

814/2023

Dumonda Rutishauser

concernent la prevenziun primara en il sector da la giuventetgna

Resposta da la Regenza

Tar la dumonda 1: Ina part impurtanta ed iniziala da CTC (Communities That Care) è l'interrogaziun da la giuventetgna. Il matg 2023 ha la citad da Cuir publictà ils resultats da questa interrogaziun. L'interrogaziun da la giuventetgna è in'enquista cumplexiva scientifica en ina vischnanca. La qualitat da las datas è perquai fitg buna. A maun da l'interrogaziun vegnan identifitgads d'ina vart ils facturs da ristga critics e da l'autra vart ils facturs da protecziun en tut ils munds da viver dals uffants e dals giuvenils. Ils munds da viver èn la famiglia, la scola, ils conturns d'abitar e la peer-group. CTC gida las vischnancas a tscherner ed a realisar programs e mesiras da prevenziun cumprovas ed efficacias. CTC gida er a rinforzar programs che funcziunan gia.

Cun fastidi constatescha la Regenza ch'ils basegns en il sector da la psicologia d'uffants e da giuvenils s'augmentan. Sch'ins resguarda tut ils puncts cuminaivels sco er las differenzas en cumparegliaziun cun las autras vischnancas da CTC, mussan ils resultats da la citad da Cuir in cler basegn d'agir. Quai vala tant areguard ils cumportaments problematic respectivs sco er areguard las constellaziuns dals facturs da ristga e dals facturs da protecziun, che correleschan cun quests cumportaments problematic. Impurtant èsi – en il senn da la strategia CTC – che las datas vegnian duvradas per formular strategias per minimar ils facturs da ristga resp. per rinforzar ils facturs da protecziun.

Tar la dumonda 2: La sanadad dals uffants e dals giuvenils vegn influenzada fermamain da lur conturns, da la famiglia, da la scola, dals conturns d'abitar e da la peer-group. La pli gronda part dals uffants e dals giuvenils ha ina buna sanadad psichica. Var 10 fin 20 pertschient èn dentant confruntads cun problems psichics.

Las suandantas mesiras da prevenziun èn efficacias:

- rinforzar las famiglias per pussibilitar a tut ils uffants – en spezial gia en la vegliadetgna prescolara – da crescer si bain e per prender en mira l'egualitad da las schanzas areguard la sanadad;

- rinforzar las personas da referiment per ils uffants ed ils giuvenils ordaifer la famiglia cun installar e cun extender la lavur sociala da scola, la lavur cun giuvenils averta e las purschidas da cussegliazion simplas en las vischnancas e regions;
- etablir en las scolas ed en las vischnancas la diagnosa tempriva e l'intervenziun a temp sco basa per s'occupar d'eventuals problems dals uffants e dals giuvenils;
- pussibilitar als uffants ed als giuvenils da cooperar en scola, en vischnanca ed en la concepziun dal spazi.

Tar la dumonda 3: La promoziun da la sanadad e la prevenziun locala èn incumbensas da las vischnancas. Il plaun communal è adattà fitg bain per mesiras preventivas, perquai che las vischnancas enconuschan il meglier ils basegns da lur abitantas ed abitants sco er las particularitads infrastructuralas. Tras quai pon vegnir elavuradas mesiras preventivas sistematicas ed efficacias cun las personas pertutgadas. I dat dentant grondas differenzas en connex cun la realisaziun en las vischnancas. Bleras vischnancas n'han per exempel betg ina lavur sociala da scola ed er betg ina lavur cun giuvenils averta. Plinavant han ellas memia paucs locals adattads per la giuvenitetgna ed er memia paucas pussaivladads da participaziun per ils uffants ed ils giuvenils. A favur da la sanadad dals uffants e dals giuvenils duessan star a disposiziun dapli resursas. Mesiras cunvegnentas èn per exempel la «maisa radunda da la diagnosa tempriva e da l'intervenziun a temp» sin plaun communal u il project «CTC». Las vischnancas pli pitschnas pon trair a niz sinergias regionalas per garantir la promoziun da la sanadad e la prevenziun. Per questas incumbensas pretensiusas porscha il chantun in sustegn professiunal a las vischnancas.

Tar la dumonda 4: Las vischnancas èn cumpetentas per survegliar las mesiras. Ellas duessan garantir ch'il stadi da la populaziun giuvna vegnia eruì regularmain e sistematicamain. Las personas che decidan duessan manar in dialog direct cun las direcziuns da scola, cun ils geniturs, cun las personas che lavuran cun giuvenils, cun il servetsch psicologic da scola e cun ils uffants ed ils giuvenils, quai per percepir ils problems che occupan tals e per alura prender las mesiras correspondentas. I dat posts spezialisads chantunals, sco jugend.gr, graubündenSport, il Post da coordinaziun per la promoziun tempriva tar l'Uffizi dal servetsch social, il Post spezialisà per l'integraziun ed il Post spezialisà per la promoziun da la sanadad, che pon gidar las vischnancas a liquidar questa lavur.



En num da la Regenza

Il president:

Peter Peyer

Il chancelier:

Daniel Spadin